
■ PCD GIUVNA DAL GRISCHUN

Na a la cassa unitara – gea per la refurma da finanzas

(cp) La Partida cristiandemocratica (pcd) giuvna dal Grischun ha prendi las parolas per las votaziuns dals 28 da settember. Ella suonda la partida-mamma. L'iniziativa per ina cassa da malsauns publica unitaria vegn refusada. Percunter vegn la refurma chantunala per la gulivaziun da finanzas sustegnida, medemamain l'iniziativa federala per abolir ina taglia da plivalur discriminanta en la gastronomia.

La situaziun momentana da la gulivaziun chantunala da finanzas metta accents fauss e preferescha ils fallads. Perquai èsi necessari da reveder la lescha per la gulivaziun da finanzas. Tras la nova lescha vegnan las mancanzas existentas eliminadas e la cumpetenzza davart la finanziaziun da las expensas surlavurada. La giuvna pcd grischuna recumonda perquai dad acceptar la gulivaziun da finanzas.

La pretensiun dad instituir ina suletta cassa da malsauns publica per la Svizra

vegn refusada cleramain. Siond che la concorrenza tranter las cassas da malsauns mancass vegnan ils custs a crescer. Plinavant manass quai ad ina concentraziun a Berna, uschia che plazzas da lavur giessan a perder en la periferia. La pcd giuvna na vesa zunt nagins avantatgs cun monopolisar e nazionalisar il sistem che funcziunia bain en cumparegliaziun internaziunala.

Il chantun Grischun po be profitar da l'iniziativa «Basta cun ina taglia da plivalur discriminanta per la gastronomia». La giuvna pcd grischuna è persuadida che la branscha turistica e la gastronomia dal Grischun vegnan stgargiadas tras quella e profitassan. Plinavant reconuscha ella las difficultads tar menaschis che mainan tant la sparta «Take-Away» (stans cun taglia da plivalur da 2,5%) sco menaschis da gastronomia (cun tariffa da plivalur dad 8%). Or da tut quellas raschuns recumonda la pcd giuvna d'acceptar questa iniziativa.